



Aningaasanut Nunanullu Allanut Naalakkersuisoq

Aningaasaqarnermut Ataatsimiititaliap suliaq nr. 01.31.06/07-00296 pillugu ulloq 28. november 2007-imi aalajangiinera pillugu Naalakkersuisunut ilisimatitsineq.
(Naalakkersuisut ulloq 5. november 2007-imi aalajangiineranni imm. 2e)

**Suliffeqarnermut Inuussutissarsiutinullu Ilinniartitaanermit Pisortaqarfimmut
ilinniartitaanikkullu immikkut ittumik suliniutinut ilassutitut
aningaasaliissuteqarnissamik qinnuteqaat**

Naalakkersuisut **inassutigaa**,

- 2007-imi aningaasanut inatsimmi kontomi pingaarnermi 62.01.01-imi, Suliffeqarnermut Inuussutissarsiutinullu Ilinniartitaanermit Pisortaqarfimmi allaffissornikkut ingerlatsinermit tunngasumi, aningaasaliissutit 1.100.000 kr.-inik amerlineqassasut,
- 2007-imi aningaasanut inatsimmi kontomi pingaarnermi 62.01.04-mi, Ilinniartitaanermi suliniutinut ilinniartitaanermilu immikkut ittumik suliniutinut tunngasumi, aningaasaliissutit -1.100.000 kr.-inik ikilineqassasut.

Aningaasaqarnermut Ataatsimiititaliap oqaaseqaatai

Suliffeqarnermut Inuussutissarsiutinullu Ilinniartitaanermit Pisortaqarfimmi 2007-imi 1,1 mio. kr.-inik atuinerussuteqarnissaq naatsorsuutigineqartoq qinnuteqaammi matumani pineqartumi takuneqarsinnaavoq. Taama atuinerussuteqarnermut pisortaqarfiup suliassaasa aningaasaliissutillu akornanni naammaginartumik ataqatigiittoqarsimannginnera pissutaanerarneqartoq.

2007-imi kvartalini siullerni marlunni atuineq tunngavigalugu 2007-imi atuinerussutaasussatut missingiineq qinnuteqaammi tunngavigineqartoq ataatsimiititaliap maluginiarpa. Tusarniaanerulli sivisuupilussuusimanerata suliassamik Aningaasaqarnermut Ataatsimiititaliamut nassiussinissaq kinguarsarsimavaa. Isummernissamat tunngavissiap Naalakkersuisut allattoqarfiannit sukumiisumik piareersarsimanagera ataatsimiititaliamit soorunami pitsaasutut isigineqarpoq, isummernissamulli tunngavissiap maannamit siusinnerusukkut nassiunneqarsimanissaa ataatsimiititaliamit kissaatiginartinneqaraluarluni. Taamaattumillu piffissap imaalinerani qinnuteqaammik aatsaat nassiussineq pissutigalugu kvartalit pingajuata kingorna angusat aamma qinnuteqaammi ilanngunneqarsimanissaat ataatsimiititaliap naatsorsuutigaa.

Piffissami ilassutitut aningaasaliissuteqarnissamik qinnuteqaatip nassiunneqarnerani (ulloq 15. november 2007) kontoni pingaarnerni eqqorneqarneqartuni 2007-imi aningaasanut inatsimmi aningaasaliissutigineqareersunit annertunerusumik atuisoqarsimannginnissaa ataatsimiititaliap naatsorsuutigilluinnarpa. Taamaattoqanngippammi aningaasat atorineqareerneranni aningaasaliisoqassamat, naluneqanngitsutullu missingersuutit pillugit inatsimmi allassimavoq aningaasaliissutit atorineqareerneranni aningaasaliissuteqarnissaq Aningaasaqarnermut Ataatsimiititaliamit akuersissutigineqarsinnaanngitsoq.

Kiisalu 2008-mi pisortaqarfimmut aningaasaliissutit equutsinneqarsinnaanerit qinnuteqaammi nangaanartoqartinneqartoq ataatsimiititaliap maluginiarpa. Taamaalillunilu

qinnuteqaammi matumani tunngavilersuutit assingi tunngavilersuutigalugit pisortaqarfimmut 2008-mi ilassutitut aningaasaliissuteqarnissamik qinnuteqaateqarnissaq ilimanarsinnaasoq paasissutissiissutigineqarpoq. Tamanna soorunami pisinnaangilaq. Missingersuutit pillugit inatsimmi § 28, imm. 2-mi naluneqanngitsutut ima allassimavoq: Nutaanik aningaasaliissuteqartoqarnissaanik aningaasaliissutinilluunniit allangortitsisoqarnissaanik qinnuteqaatit taamaallaat aningaasaqarnikkut iliuusissanut pingaarutilinnut aammalu anigaasanut inatsisissap suliarinerani sillimaffigereerneqarsinnaasimanngitsunut tunngasuusassapput. Suliffeqarnermut Inuussutissarsiutinullu Ilinniartitaanermut Pisorta qarfiup ilassutitut aningaasaliissuteqarfineqarnissamik pisariaqartitsinera kvartalip aappaani angusat paasineqarmatali ilisimaneqalersimavoq, tassa 2007-imi augustimili. Taamaallillunilu 2008-mi anigaasanut inatsisissap suliarineqarnerani Pisorta qarfiup aningaasaliissutinik amerlanerusunik pisariaqartitsinera qularutissaanngilluinnartumik siumut naatsorsuutigineqarsinnaasimavoq. Taamaattumillu qinnuteqaammi matumani tunngavilersuutit assingi tunngavilersuutigalugit Pisorta qarfimmut 2008-mi ilassutitut aningaasaliissuteqarnissamik qinnuteqaateqarnikkut aningaasaliissuteqartoqarsinnaangilaq.

Kiisalu kontomut pingaarnermut 62.01.01-imut, Suliffeqarnermut Inuussutissarsiutinullu Ilinniartitaanermut Pisorta qarfimmi allaffissornermut tunngasumut, missingersuutinut ilanngussami nassiunneqartumi sulisunut takussutissiaq amigaataavoq. Missingersuutinut ilanngussaq 2007-imi ilassutitut aningaasaliissutinut inatsimmut ilanngunneqartinnagu taanna tassunga ilanngunneqarsimassaaq. Missingersuusiornermi malittarisassami 2002-meersumi immikkoortut 7.2 aamma 11 innersuussutigineqarput.

Aningaasaqarnermut Ataatsimiititaliap aalajangiinera

Suliani oqaaseqaatigineqartut innersuussutigalugit Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput.**

Inussiarnersumik inuulluaqqusillunga

Augusta Salling
Aningaasaqarnermut Ataatsimiititaliap siulittaasua